



juli 2017. • List RMU "BANOVIĆI"  
BESPLATAN PRIMJERAK

# RUDAR

TERMoeLEKTRANA BANOVIĆI:

**USAGLAŠENI I PARAFIRANI  
UGOVORI O IZGRADNJI  
TERMoeLEKTRANE**

SKUPŠTINA DRUŠTVA:

*USVOJENI GODIŠNJI IZVJEŠTAJI  
O POSLOVANJU RUDNIKA  
U 2016. GODINI*



SEPARACIJA:

**OKONČAN VELIKI REMONT  
NA SEPARACIJI**





TERMoeLEKTRANA BANOVIĆI, BLOK 1-350MW  
THE THERMAL POWER PLANT BANOVIĆI, UNIT 1-350MW



**ZVANIČNO POTVRĐENO:**

## **USAGLAŠENI UGOVORI O IZGRADNJI TERMoeLEKTRANE U BANOVIĆIMA DOBILI PODRŠKU UPRAVE I NADZORNOG ODBORA RUDNIKA**

Nakon više od godinu dana intenzivnih pregovora sa kineskom ICBC bankom konačno je usaglašen i parafiran Ugovor o finansiranju 85% projekta izgradnje termoelektrane u Banovićima blok 1 snage 350MW. To je krajem prošle sedmice potvrdila Uprava Društva i Nadzorni odbor dajući saglasnost na Ugovor.

Pregovore je vodila Stručna komisija Rudnika zajedno sa pravnim, tehničkim i ekonomskim konsultantima (Wolf Theiss d.o.o. Sarajevo, KPMG B-H Zagreb i VPC GmbH Njemačka) na više lokacija, kako u BiH tako i u Kini. Neprestalna elektronska komunikacija, kao i neposredni sastanci rezultirali su da se dvije strane na obostrano zadovoljstvo dogovore do najsitnijih detalja finansiranja projekta.

Slijedeći korak kada je u pitanju finansiranje projekta jeste usaglašavanje Ugovora o finansiranju 15% vrijednosti projekta, koji se vodi sa domaćim bankama na čelu sa Unicredit bankom i trebao bi biti dogovoren u toku slijedeće sedmice. Na sjednici Uprave i Nadzornog odbora Rudnika saglasnost su dobili i Ugovor o vođenju i održavanju bloka na period od tri godine i Ugovor o Strateškom partnerstvu.

Ugovor o vođenju i održavanju bloka usaglašen je

sa kineskom kompanijom Dongfang Electric Corporation, a pored vođenja i održavanja bloka definiše obuku i usavršavanje radnika buduće termoelektrane, te obavljanje godišnjih remonta. Ugovor bi se trebao potpisati na tri godine sa mogućnošću eventualnog produženja.

Kada je u pitanju Ugovor o Strateškom partnerstvu on sadrži sve elemente EPC Ugovora, Ugovora o održavanju i vođenju bloka, te tehničke i tenderske dokumentacije. Nakon usaglašavanja i parafiranja Ugovora o finansiranju 15% vrijednosti projekta svi ugovori biće poslani na razmatranje i usvajanje Vladi FBiH i na oba doma Parlamenta BiH i već u julu mjesecu očekuje se konačan odgovor i izdavanje garancije.

Kineska kompanija (DEC) otpočela je izradu glavnog projekta, a po završetku pripremnih radova, geomehaničkog istraživanja terena i izrade Elaborata biće stečeni uslovi za pristupanje završnoj fazi izrade glavnog projekta.

Kada je u pitanju stručni tim okupljen oko projekta izgradnje termoelektrane, trenutno rade na odabiru „Inžinjera“ – organa koji će voditi nadzor nad projektovanjem, gradnjom i proizvodnjom opreme u BiH i inostranstvu.



## ODRŽANA 25. REDOVNA SJEDNICA SKUPŠTINE RMU "BANOVIĆI" D.D. BANOVIĆI

# USVOJENI IZVJEŠTAJI O POSLOVANJU I RASPODJELI DOBITI DRUŠTVA ZA 2016. GODINU



Dvadeset i peta redovna sjednica Skupštine rudnika "Banovići" održana je 30. juna u prostorijama Radničkog Doma. Dnevni red Skupštine sadržavao je tri tačke, a pored izbora radnih tijela, odlučivalo se i o usvajanju Godišnjeg izvještaja o poslovanju Društva za 2016. godinu sa Izvještajem vanjskog revizora i Izvještajem o radu Nadzornog odbora i Odbora za reviziju. Na sjednici se takođe odlučivalo i o raspodjeli dobiti za 2016. godinu.

Predstavnik Vlade FBiH, većinskog vlasnika kapitala, bio je Tarik Begić, koji je jednoglasnom Odlukom dioničara izabran i za predsjednika Skupštine.

Pravo na učešće i odlučivanje na 25. redovnoj sjednici Skupštine Rudnika imalo je 483.162 dionica, odnosno 69,63%, što je bilo dovoljno da se ispuni kvorum za rad i odlučivanje.

U skladu sa rezultatima glasanja sve tačke dnevnog reda izglasane su stopostotnim procentom, tako da glasačkih listića "protiv" i "suzdržanih" nije bilo.



### GODIŠNJI IZVJEŠTAJ O POSLOVANJU RUDNIKA

## 2016. GODINA U ZNAKU POZITIVNIH POSLOVNIH I FINANSIJSKIH REZULTATA

Pozitivan finansijski rezultat u 2016. godini ostvaren u iznosu od 1.153.449 KM produkt je marljivog rada i kontinuitet na koji su radnici rudnika „Banovići“ već navikli. 2.708 zaposlenih zaslužno je što je u pomenutom periodu proizvedeno 1.564.538,88 tona separisanog uglja čija toplotna vrijednost na nivou Rudnika iznosi 16.279 kJ/kg.

Od ukupnog broja proizvedenih količina uglja čak 1.145.089,90 tona prosječne toplotne vrijednosti od 15.448 kJ/kg isporučeno je za potrebe Termoelektrane Tuzla.

Izvještajem je potvrđeno da je najveći udio u ukupnim prihodima ostvaren upravo od prodaje uglja. Prihodi na nivou Društva iznose 150.821.672 KM, dok su ukupni rashodi ostvareni oko 149.688.223 KM i za 1,66% manji su nego što je to planom predviđeno.

Znatan prebačaj od 17,63% zabilježen je i na proizvodnji otkrivke, koja je realizovana u iznosu od 11.998.010 metara kubnih čvrste mase.

Prekoplanska proizvodnja uglja i otkrivke i ovaj put iziskivala je određena ulaganja u opremu. U 2016. godini zabilježena su investiranja u iznosu od 6.216.812 KM i u cjelosti su finansirana iz sopstvenih sredstava Rudnika.

Na kraju godine preduzeće je brojalo 2.708 radnika koji su ostvarili prosječnu platu u visini od 986,13 KM i koja je za 17,24% veća od prosječne plate u FBiH.

Već trinaest godina za redom svjedoci smo pozitivnih rezultata i Izvještaja RMU „Banovići“ d.d. Banovići na koje je svaki put do sada pozitivan sud dao Nadzorni odbor i Skupština Društva.



# OBAVLJEN KOMPLETAN REMONT NA SEPARACIJI STANJE U POGONU NA ZADOVOLJAVAJUĆEM NIVOU

Nakon višemjesečnih remonta, čišćenja i saniranja Separacije konačno je konstatovano da se pogon stabilizovao i da tehnološki proces separisanja uglja u narednom periodu može odgovoriti zahtjevima tržišta. Prethodnih mjeseci intenzivno je rađeno na zamjeni dotrajalih i oštećenih strojeva i cjevovoda Separacije koji su pravili probleme u tehnološkom procesu i znatno smanjili proizvodnju uglja. Urađena je zamjena jednog i skraćivanje drugog trakastog transportera, uređeni su sabirnici, zamijenjen prelivni cjevovod, cijevi na vibracionom situ i mnogi drugi poslovi.

Poslova je bilo mnogo, a radnika pogona nedovoljno, pa su u cilju pravovremenog djelovanja angažovani radnici drugih firmi na određenim poslovima, kao i radnici preko zadruge. Nastojale su se što prije otkloniti poteškoće i proizvodnja vratiti na planiranu razinu. Obzirom da je stanje bilo relativno loše, na inicijativu izvršnog direktora za tehničke poslove dr. Ibrahima Lapandića, u pomoć je pritekla i četa Rudnika. Radnici, njih oko 80, tri dana čistili su Separaciju i dali ogroman doprinos u osposobljavanju i podizanju stepena sigurnosti pogona.

Svaki mjesec četa za spašavanje ima obavezu da obavi teorijsku i praktičnu kondicionu vježbu. Tako je bilo i tokom mjeseca juna, samo što je praktična vježba ovaj put zbog potreba Rudnika bila na Separaciji. Zajedno sa radnicima ovog pogona tri dana zaredom radili su na sanaciji i čišćenju pogona i postrojenja. Učestvovali su svi, od stariješine Vahidina Aganovića do apsolutno svih članova čete koji su bili raspoređeni u više ekipa na različitim poslovima. Da je četa za spasavanje na raspolaganju Rudniku 24 sata dokazali su i ovaj put dajući značajan doprinos u osposobljavanju Separacije i nastavku nesmetanog odvijanja proizvodnje.

Na dan velikog remonta zatekli smo se na licu mjesta i prvo što smo vidjeli jeste hrpa odloženih neupotrebljivih cijevi koje su netom prije izvučene iz Separacije i koje su jasno odavale sliku prethodnog stanja pogona.

Radili su svi od NK radnika do upravnika pogona sa kojim smo i razgovali. Salko Gutić tehnički rukovodilac Separacije smatra da će sa završenim opravkama, zamjenama i čišćenjem postrojenja za separisanje biti u mogućnosti oplemeniti sve eksploatisane količine uglja. Nakon velikih remonta mišljenja je da je na red došlo i čišćenje svijesti pojedinih radnika.



- Jako je bitno da poradimo i na svijesti uposlenih, definitivno postoji određeni broj ljudi koji zanemaruje važnost Rudnika. Ljudska je obaveza da dođemo na posao da odgovorimo zadatku, damo svoj doprinos i zajedno obezbijedimo nesmetano funkcionisanje ovog preduzeća zbog kojeg redovno primamo plate i koje je garant opstanka naše Općine. Na sanaciji smo radili i uradili mnogo, a ono na čemu još možemo poraditi je disciplina radnika – poručio je tehnički rukovodilac Separacije Salko Gutić.

Jedan od onih kojima nema potrebe buditi svijest o značaju i vrijednostima Rudnika je i nekadašnji bravar Muharem Avdić. Već izvijestan period je invalid rada zbog čega trenutno obavlja poslove ložača. To ga nije spriječilo da na dan velikog remonta obuče čizme, uzme lopatu i pridruži se ostalima u sanaciji pogona.



- Dio ovog kolektiva postao sam 2007. godine obavljajući poslove bravara. Vremenom su se pojavili zdravstveni problemi i evo me sada tu, zadužen na poslovima ložača u kotlovnici. Međutim, kada su u toku intenzivni radovi i opravke nastojim pomoći i doprinijeti koliko mogu. Drago mi je da smo se konačno aktivirali i počeli raditi na sređivanju stanja u ovom pogonu i povećanju pouzdanosti separisanja, jer džaba nam velike količine uglja ako ih nismo u mogućnosti oplemeniti – kazao je Avdić.

Već 29 godina radnik ovog pogona je i Amir Balkić.



Na početku u ulozi fizičkog radnika, a već danas poslovođa smjene i jedan od organizatora svakog remonta na Separaciji. Sa svojom grupom ljudi uvijek je na „prvoj liniji“ obavljajući izuzetno teške i zahtjevne poslove. Teško jeste, ali nije neizvodljivo kaže Balkić.



- Čitav svoj radni vijek proveo sam na Separaciji i iz iskustva mogu reći da je ovo jako specifičan i zahtjevan posao. U posljednjih nekoliko mjeseci radovi su znatno povećani, ali i potreba za dodatnom radnom snagom. Obzirom da se ovdje trenutno obavlja nikad veći remont u susret su nam izašli radnici iz cijelog Rudnika. Zajedničkim snagama ojačali smo veliki dio postrojenja i spremili se za nadolazeću sezonu i povećanu potražnju za ugljem. Iskreno se nadam da nakon završenih poslova možemo nastaviti sa prekoplanskom proizvodnjom uglja jer nam je to u ovom momentu potrebno više nego ikad – rekao je Amir.

Zbog važnosti svake minute, posebno tokom velikih remonta, naši sagovornici morali su se vratiti na posao, kao i oni koji su nam pravili društvo dok su koristili svoje dvije minute za cigaretu.

## PROIZVODNJA UGLJA I OTKRIVKE ISKORIŠTENI POVOLJNI VREMENSKI USLOVI ZA REMONTE, SANACIJU I PRIPREMU POGONA

**N**akon dobrog starta na proizvodnji uglja i otkrivke u prva tri mjeseca tekuće godine, tokom mjeseca aprila, maja i juna uslijedili su određeni padovi. Jedan od bitnih razloga ovakve situacije jesu učestali remont i saniranja pogona „Separacija“.

U mjesecu aprilu proizvedeno je 114.653 tona separisanog uglja što je oko 92,68%, dok je proizvodnja otkrivke iznosila 928.285 metara kubnih odnosno 91,08% u odnosu na plan.

Nešto bolja proizvodnja bilježena je u mjesecu maju kada je proizvedeno 3,38% preko plana, odnosno 123.640,9 tona separisanog uglja, dok je proizvodnja otkrivke ostala na nivou prethodnog mjeseca. Realizovano je 988.890 metara kubnih čvrste mase ili procentualno posmatrano oko 91,34% u odnosu na plan.

Mjesec juni mogao bi se okarakterisati kao mjesec najvećih remonta i sanacija u svim pogonima Rudnika što se u velikoj mjeri odrazilo i na proizvedenu količinu uglja i realizovanu otkrivku. Proizvodnja uglja iznosila je 111.561,3 tona što je za oko 9,93% manje u odnosu na plan. U ovom periodu počelo je i prebacivanje opreme mehanizovanog širokog čela u novo otkopno polje, a već do 20. jula najavljeno je završavanje poslova i početak mehanizovane eksploatacije uglja iz jame.

Realizacija otkrivke u mjesecu junu bila je u visini od 993.730 metara kubnih čvrste mase i za oko 2,5% je ispod plana.

Optimistično je to što se i u ovako specifičnim uslovima remonta i višednevnih zastoja uspjela osigurati dobra proizvodnja i povoljan finansijski rezultat, jer je u prvom dijelu godine predviđen mnogo veći negativan finansijski rezultat, a u konačnici je iznosio tek oko 200.000 KM.



Prema riječima izvršnog direktora za tehničke poslove dr. Ibrahima Lapandića ovo bi trebala biti jedna od boljih godina za Rudnik, te da se do kraja očekuje ispunjenje svih zacrtanih planova. U narednim mjesecima eksploatisat će se kvalitetniji i krupniji ugalj kojeg ima u dovoljnim količinama i koji će zasigurno osigurati veću finansijsku dobit nego ranijih godina.



ŽELJEZNIČKI TRANSPORT

# ANGAŽOVANOST I MOBILIZACIJA JEDINI GARANT FUNKCIONALNOSTI POGONA



Njihov radni dan i ovaj put počeo je u sedam sati ujutro odlaskom u radionicu i zauzimanjem pozicija za radnim mašinama. Nije ih teško pronaći jer zvuk mašina čuje se daleko. Tako je bilo i tokom nedavne posjete. U pogonu „Željeznički transport“ zatekli smo radnu atmosferu. Bilo je vrijeme pauze, ali se i dalje predano radilo i započeti poslovi privodili su se kraju. To je ovdje, kako kasnije saznajemo, uobičajena praksa.

Iako je radionica bila puna dobro raspoloženih radnika većina njih nije bila spremna da o svom rudarskom životu i radu govore javno, ali smo kroz neformalan razgovor od njih saznali mnogo stvari vezanih za proizvodni proces ovog pogona. Oni malo hrabriji stali su ispred nas i u nekoliko rečenica opisali svoj radni vijek od samih početaka do danas. Ponosno su pričali o svemu i imaju potpuno pravo na to.

Priča Nijaza Čolića počinje davne 1983. godine kada dobija posao NK radnika u jami. Poslije nekoliko odradenih godina prelazi u Kolsku, gdje i dan danas radi kao bravar u veoma specifičnoj radionici u kojoj se proizvodi „od igle do lokomotive“. Posao ovdje možda nije težak kao onaj u jami, ali zahtijeva stalnu prisutnost i angažovanost kako ostali poslovi zbog kvarova ne bi trpjeli.

- Ovdje su svi u stalnoj pripravnosti. Kvarovi su stvar trenutka i treba reagovati, jer mi posjedujemo i neke od najstarijih mašina za kojih više nema originalnih rezervnih dijelova. Sve je u našim rukama i našem umijeću. Iako nas nema dovoljno i takve poslove obavljamo bez problema. Nažalost situacija po pitanju broja radnika nije zadovoljavajuća, a nije se znatno popravila ni prijemom novih. Ovdje je došlo samo nekoliko radnika, a posljednjih godina otišlo ih je mnogo više. Iz tog razloga moramo biti kao jedan i međusobno imati povjerenja ukoliko želimo posao obaviti kako treba i zdravi otići kući. Poslovi su teški, ali uprkos tome do sada nisam imao nijednu težu povredu na radu, a i odnos sa kolegama je uvijek bio dobar. Odlazili su i dolazili mnogi, desila se smjena generacija, ali problema u međuljudskim odnosima nikada nije bilo - kaže nam Čolić.

Istog dana razgovarali smo i sa Mehmedom Dostovićem, zaposlenikom ovog pogona koji radi na poziciji VK mehaničara. Radi, kako kaže, na svim poslovima u pogonu.



Ono što je posebno zanimljivo i pohvalno kada je Mehmed u pitanju jeste činjenica da je invalid rada, ali da uprkos tome i dalje obavlja poslove kao i svi drugi radnici.



Nikada se nisam žalio niti tražio da mi se utvrđuje postotak invalidnosti. Osjećam se sposobno i zdravo i dok je tako nema potrebe za poštudama. Zdravlje me dobro služi i za svih ovih devet godina nisam uzeo ni dan bolovanja. Kada je posao malo teži moje kolege mi uvijek priteknu u pomoć, a ni ja se ne štedim kada su oni u pitanju i pomognem najbolje što znam – kaže Mehmed.

Da je Mehmed prvenstveno dobar čovjek i drug vidjeli smo na licu mjesta kada se tokom razgovora oko nas okupilo 5-6 njegovih kolega, koji za njega imaju samo riječi hvale. Kažu da je vrhunski majstor i da boljeg od njega nemaju. Razumije se apsolutno u sve poslove i uvijek je tu da interveniše kada „zakoči“. Intervenција

je bila potrebna i u trenutku razgovora tako da smo bili prinuđeni brzo se pozdraviti.

Posmatrajući ovu ujedinjenu grupu ljudi kako odlazi i zauzima svoje radne pozicije, mogao se steći utisak da se radi o jednoj zdravoj zajednici, skromnim, solidarnim i zadovoljnim ljudima. To i jeste jedina istina, jer Rudari nemaju vremena za mržnju i zavist.

Da zajednička snaga daje pozitivne efekte mišljenja je i rukovodilac pogona Davorin Zarić, koji kaže da nema nikakvih problema sa svojim radnicima i da iz tog razloga nije teško situaciju držati pod kontrolom i odgovoriti na sve postavljene zadatke.

- Što se tiče stanja u pogonu ja sam zadovoljan, jer smo u svakom momentu spremni obezbijediti prevoz na određeno mjesto za svaku iskopanu tonu uglja. Redovan servis i kvalitetno izvođenje popravki u vlastitoj režiji jedan je od ključnih razloga ovakvog stanja – kazao je Zarić.

Iako okupirani svojim poslovima kada god su u prilici rudari priteknu u pomoć i kolegama iz drugih pogona. Tako već nekoliko mjeseci unazad ekipe iz „Željezničkog transporta“ idu na Separaciju kako bi pomogli u čišćenju i održavanju pogona, jer kako kažu, nije bitno o kojem pogonu se radi sve je to Rudnik.

## OBOGAĆEN VOZNI PARK RUDNIKA „BANOVIĆI“ NABAVLJENO OSAM NOVIH FORD RENDŽERA

Početkom juna za potrebe Rudnika u Vozni park stiglo je osam novih Ford Rendžera čija ukupna vrijednost iznosi 369.000 KM. Investicija je realizovana prvenstveno zbog potrebe Rudnika za ovakvom vrstom vozila koja će olakšati rad i zamijeniti dosadašnja dotrajala vozila.

Nabavkom novih rendžera iz upotrebe će u potpunosti biti izbačene stare nive i lade koje su trenutno u dosta lošem stanju, a čije su dosadašnje popravke i potrošnja benzina pravile velike izdatke. Zbog toga je investicija bila logičan potez iz kojeg će proizaći znatne novčane uštede.

Prva vozila ovakve vrste nabavljena su prije četiri godine, a upravo su njihov kvalitet i isplativost rezultirali nabavkom novih osam. Rudnik trenutno raspolaže sa čak 17 savremenih Ford Rendžera, koji su raspoređeni na rudničke pogone ovisno o iskazanim potrebama.

Ovo nije jedino ulaganje u Vozni park Rudnika.



Nedavno je nabavljen i minibus za potrebe čete za spasavanje vrijedan 37.500 KM. Svojim karakteristikama u potpunosti zadovoljava sve specifične potrebe i situacije u kojima se četa za spasavanje često nalazi.





# OPĆINA BANOVIĆI ZA NASTAVAK UREĐENJA INFRASTRUKTURE PREKO 5 MILIONA KM



Općinske strukture vlasti nastavljaju dobrim tempom implementaciju ranije započetih infrastrukturnih projekata, ali i početak novih projekata. U saradnji sa višim nivoima vlasti realizuju značajne projekte iz oblasti putne i vodoprivredne infrastrukture, te energetske efikasnosti ukupne vrijednosti preko 5 miliona KM. Kao i prethodnih godina putna infrastruktura dominira ali ne zaostaje se ni sa ostalim oblastima uređenja, navodi općinski načelnik Midhat Husić u razgovoru za Rudar.

- U saradnji sa Direkcijom cesta TK privodimo kraju radove na implementaciji najvećeg infrastrukturnog projekta - izgradnja kružnog toka ukupne vrijednosti oko 1,5 milion KM. Uskoro se očekuje i početak radova na rekonstrukciji dijela regionalne ceste na potez od pružnog prelaza do Energopetrolove pumpe ukupne vrijednosti 900.000 KM.

Na području izgradnje kružnog toka uspješno su završeni radovi na izmiještaju vodovodne i kanalizacione mreže, zamjena toplovodne mreže, te asfaltiranje glavnih saobraćajnica. Asfaltiranje pomoćnih staza i izrada putne signalizacije kao i program zvaničnog puštanja u rad saobraćajnice očekuje se u skorije vrijeme.



Pored ovih ulaganja, u općinskom budžetu su predviđena sredstva u iznosu od 750.000 KM za rekonstrukciju i asfaltiranje deset dionica na području cijele Općine - pojasnio je načelnik Husić. Implementacijom ovih projekata značajno će se poboljšati putna infrastruktura i život stanovnika učiniti ugodnijim i ljepšim, a tome će doprinijeti i značajna ulaganja u manje projekte kao što su izgradnja potpornih zidova na kritičnim lokacijama, kontinuirana sanacija, uređenje i održavanje svih putnih pravaca na području Općine.

Kada su u pitanju energetske efikasne projekte, načelnik Husić navodi da se u ovoj godini planiraju implementirati dva takva projekta. Jedan podrazumijeva sanaciju zgrade tzv. Trgovačka gdje će firma upravitelj „Mont-Fasaden“ d.o.o. zajedno sa vlasnicima stanova sanirati krov zgrade, a Općina će obezbijediti sredstva za izradu termo fasade u vrijednosti od 180.000 KM. Drugi energetske efikasne projekat odnosi se na rekonstrukciju krova zgrade tzv. Samačka za čiju sanaciju je Općina u saradnji sa višim nivoima vlasti obezbijedila sredstva u iznosu 150.000 KM.

U oblasti vodoprivredne infrastrukture privode se kraju pripreme aktivnosti za izgradnju nekoliko novih vodovoda, pumpnih stanica i rezervoara, te izgradnju kanalizacione mreže kao i nekoliko manjih intervencija u ovoj oblasti na području cijele opštine zašto su planirana sredstva u iznosu od milion KM. Pored toga, u saradnji sa Američkom ambasadom u BiH realizovat će se dva značajna projekta i to: rekonstrukcija i sanacija Osnovne škole Grivice zašto je Općina obezbijedila 85.000 KM, a Američka ambasada BiH 250.000 dolara, te projekat izgradnje aneksa Doma zdravlja za koji je Američka ambasada obezbijedila sredstva u iznosu od 150.000 dolara, a Općina 400.000 KM.

Kako bi se i u 2018. godini mogla planirati realizacija značajnih projekata Općina intenzivno provodi aktivnosti na izgradnji projektne dokumentacije i u tu svrhu su planirana sredstva od 100.000 KM.

Na kraju razgovora, načelnik Husić navodi da je realizaciju planiranih projekata značajno usporilo kašnjenje sa izradom prostornog plana opštine Banovići i regulacionog plana Sadnice koji u velikoj mjeri definišu realizaciju svih projekata.



KROV NAD GLAVOM ZA OSAM ROMSKIH PORODICA

# U SARADNJI SA EU IZGRAĐENA DVA MODERNA STAMBENA OBJEKTA



U sklopu projekta akcije podrške i socijalnog uključivanja Roma pod nazivom „Roma akcion“ u Banovićima 19. juna zvanično je izvršena primopredaja stanova za osam ekonomski i socijalno ugroženih romskih porodica bez riješenog stambenog pitanja.

Implementator projekta je Hilfswerk Austria koji je u suradnji sa državnim i lokalnim vlastima od potpuno neiskorištenog zemljišta, na području mjesne zajednice Podgorje, za samo par mjeseci izgradio dva moderna stambena objekta. Krov nad glavom osiguran je za pripadnike romske zajednice koji su do sada živjeli u vrlo lošim i nezdravim uslovima.

Ceremoniji primopredaje stanova prisustvovali su brojni zvaničnici i predstavnici EU i općine Banovići. Prilikom da se prisutnima obrati imao je i Khaldoun Sinno zamjenik šefa delegacije EU u BiH rekavši da je ovo samo dio projekta Evropske Unije vrijedan oko 5,5 miliona KM namijenjen za pomoć socijalno ugroženim kategorijama.

- Drago mi je što danas zvanično uručujemo ključeve ove dvije stambene jedinice i što imamo priliku vidjeti zadovoljna lica korisnika. Ovaj

projekat vid je šire podrške romskoj populaciji. Nažalost stambeno situiranje nije jedino što je potrebno ovim ljudima. Jako je važno da ih uključimo u zapošljavanje, obrazovanje i socijalizaciju u društvo. Ono što je pohvalno ali i potrebno za realizaciju ovakvih projekata jeste podrška predstavnika općinske vlasti – izjavio je Khaldoun Sinnon.

Na kraju je dodao da izgradnjom ovih objekata neće stati saradnja sa općinom Banovići i Romima ovog podnevlja, te da će se u dogledno vrijeme sigurno vratiti u Banoviće.

Finansijski doprinos projektu u visini od 40.000 KM dala je i općina Banovići na čelu sa načelnikom Midhatom Husićem, koji nije krio zadovoljstvo zbog izgrađenih stanova. Zahvalio se svima koji su učestvovali i osjetili potrebu pomoći ovim ljudima.





## IZGRADNJA DŽAMIJE ISLAMSKOG CENTRA U BANOVIĆIMA KLANJANA PRVA DŽUMA I TERAVIH NAMAZ



Ideja izgradnje Islamskog centra u Banovićima nastala je davne 1996. godine., a od 2005. godine pa do danas na projektu se radilo u etapama. Početak mjeseca ramazana bio je idealna prilika da se vjernicima otvore vrata ove Božije kuće. Tako je 26.05.2017. godine. džamija otvorena za sve vjernike koji nisu krili zadovoljstvo na pruženoj prilici da mubarek mjesec dočekaju u novoizgrađenom objektu.

Radovi na Islamskom centru će se nastaviti, kaže mr. Sead ef. Mrahorović, na prostoru veličine 7.000

metara kvadratnih. Centar je projektovan u stilu tradicionalne arhitekture i osim džamije imaće edukacijski dio, biblioteku, obdanište, zatim sportsku dvoranu, restoran i druge sadržaje namijenjene muslimanima.

Za izgradnju Centra do sada je utrošeno preko milion maraka. Sredstva su prikupljena prije svega zahvaljujući podršci općine Banovići i RMU "Banovići".

Projektu su dali doprinos i menadžmenti banovićkih preduzeća, radnici i uposlenici, građani, džematlije i svi oni koji su svojim donacijama, radom, sugestijama, idejama bili uz izgradnju džamije.



## ORGANIZOVAN IFTAR ZA GRAĐANE BANOVIĆA PREKO HILJADU PORCIJA ZA POSTAČE

Već treću godinu za redom kao kruna mubarek mjeseca Ramazana na Trgu žrtava genocida Srebrenice u Banovićima organizovan je iftar za preko hiljadu postača. Veliki odziv građana učinio je ovu večer još posebnijom i iz našeg grada poslao sliku dobročinstva, mira i zajedništva.

U organizaciji iftara učestvovalo je udruženje žena SDA Banovići, članovi KUD-a Litva, banovićki ugostitelji, kao i mnogobrojni građani. Posebna zahvalnost ide našoj mladosti koji su osjetili potrebu i uključili se u organizaciju jednog ovakvog događaja. Zajedno sa svojim sugrađanima tu noć iftarili su premijer TK Bego Gutić, načelnik općine Banovići Midhat Husić i zastupnica parlamenta Federacije BiH Elzina Pirić.

Vrijeme prije iftara iskorišteno je za vjersko – kulturni program, a "Hor Muqaddim" i banovićke zvijezde Damir Džakić i Aldin Čeragić učenjem ilahija učinili su događaj još ugodnijim.

Specijalno za ovu priliku iz Tuzle je stigao top koji je označio vrijeme iftara, a potom je zaučio i ezan sa gradske džamije u Banovićima. Uz sjaj kandilja i prijatnu atmosferu završena je još jedna lijepa ramazanska noć. Ovaj događaj zbog svoje ljepote i vrijednosti trebao bi ostati tradicija i obaveza budućim generacijama.





# SKUPŠTINA DEMOBILISANIH BORACA TK JEDNOGLASNO: ZLATNA PLAKETA SA LJILJANOM ZA DIREKTORA RUDNIKA „BANOVIĆI“



Skupština Saveza demobilisanih boraca Tuzlanskog kantona jednoglasno je donijela Odluku o dodjeli priznanja Zlatna plaketa sa ljiljanom direktoru Rudnika „Banovići“ dr. Muneveru Čeragiću.

Plaketa je vid zahvale Rudniku za nesebično zalaganje i doprinos u rješavanju osnovnih problema zapošljavanja demobilisanih boraca i članova njihovih porodica putem konkursnih procedura od 2005. do 2017. godine. U pomenutom periodu u rudnik „Banovići“ primljeno je 1.529 radnika od kojih 836 pripadnika boračke populacije, a to je 54% od ukupnog broja primljenih radnika. Također je primljeno 615 djece demobilisanih boraca koji se Zakonom vode i tretiraju na isti način kao i demobilisani borci.

Angažovan je i veliki broj djece boračke populacije na volonterski/pripravnički rad kako bi stekli osnovne uslove za konkurisanje na tržištu rada i time olakšali put do zaposlenja.

Poznato je da je Rudnik „Banovići“ jedno od preduzeća koje posebno vodi računa o ovoj kategoriji i spada među rijetke privredne subjekte koji i nakon rata daju prioritet pri zapošljavanju ovih ljudi. Iako činjenice o zalaganju menadžmenta postoje bilo je i onih koji su osporavali odnos prema boračkoj populaciji prilikom zapošljavanja i Rudnik dovodili u negativan kontekst.

Kako iz Rudnika najvaljuju ovo nije kraj

zbrinjavanja ove osjetljive populacije. Planirana gradnja jednog od najvećih poslijeratnih projekata u FBiH termoelektrane u Banovićima zahtjevat će i povećan broj radnika u kojem će sigurno kao i do sada svoje mjesto naći nezaposleni demobilisani borci i članovi njihovih porodica.

U ime Vlade TK čestitke Rudniku na ovom značajnom priznanju uputio je i premijer TK Bego Gutić.

- Imajući u vidu sa koje strane dolazi moram reći da je ovo priznanje od iznimnog značaja. Rudnik „Banovići“ dao je maksimum kada je u pitanju zapošljavanje demobilisanih boraca i njihovih porodica, te je ovo priznanje u potpunosti zaslužno. U to ime upućujem iskrenu čestitku menadžmentu Rudnika – izjavio je premijer TK.





# „ENERGA 2017“ U SARAJEVU



**M**eđunarodni sajam energetike „Energa 2017“ početkom juna održan je u sarajevskom sajamskom prostoru centra Skenderija pod pokroviteljstvom Ministarstva vanjske trgovine i ekonomskih odnosa BiH, Ministarstva energije, rudarstva i industrije FBiH, Vlade Kantona Sarajevo i Grada Sarajeva.

Manifestacija pod nazivom „Mislimo na budućnost“ ove godine okupila je više od 100 izlagača iz 13 zemalja i 150 učesnika konferencijskog dijela projekta. Ovo je bila jedinstvena prilika da se već sedmu godinu zaredom na našim prostorima promoviraju energija, rudarstvo, proizvodi, projekti, ideje i usluge kompanija širom svijeta.

Zvanično presijecanje vrpce i otvaranje Sajma pripalo je ministru vanjske trgovine i ekonomskih odnosa BiH Mirku Šaroviću, premijeru Kantona Sarajevo Elmedinu Konakoviću, predsjedniku inicijativnog odbora projekta „Energa 2017“ Mirsadu Džonlagiću i potpredsjedniku vanjsko –

trgovinske komore BiH Bruni Bojiću.

Tokom uvodnog obraćanja uputili su čestitke svim prisutnim i poželjeli im sreću u prezentaciji i sklapanju poslovnih ugovora. Iznijeli su jedinstven stav da BiH ima ogroman potencijal u energetskom sektoru, te da se postojeći resursi moraju staviti u funkciju kako bi se BiH približila euroatlanskim integracijama.

Kao i svake godine priliku da promoviraju svoje proizvode i planove, te uspostavi regionalne poslovne veze nije propustio ni rudnik „Banovići“. Fokus je kao i nekoliko prethodnih godina stavljen na Strateški projekat izgradnje termoelektrane u Banovićima, koji je i dalje jako interesantan privrednicima širom Evrope. Što zbog imidža u privredi, što zbog projekata u nastajanju „štand“ rudnika „Banovići“ bio je posebno zapažen. Posjetioци su imali priliku pogledati promotivni film o Rudniku, ali i pročitati i saznati više o projektu izgradnje termoelektrane.

